

vnd derer Naturen das Wasser zu wider
ist:

Derhalben hat der Allergnedigste
Gott vnd Himlische Vater / nach seiner vn-
ausprechlichen gute / vnnnd gegen das
Menschliche geschlecht wolthetigkeit / da-
mit es zu erhaltung dieses lebens an nich-
ten mangeln / noch gebrechen solte / an stat
des Weins / diesen gar gesunden getranck
des Biers gezeiget / vnd geben / der jeder
vnd allezeit / auch allenthalben / vnd an ei-
nem jeden ort / zugerichtet vnd gebrawet
werden kan / vnd da es nicht allein am
Herbst / oder gutem schönen wetter / vnd
Sonnenschein gelegen / das es wol gera-
the / wie mit dem Wein / Sondern nur al-
lein an dem stehet vn̄ hafftet / das Wasser /
Korn / vnd Hopffe gut sey / Derhalben
man das Bier billich / Teudschen / oder
Septentrionalischen / Mitternechtischen
Wein nennen solte.

Zedoch so hat das Bier / in viele we-
ge / einen vnterscheidt vom Wein / Der
Wein nutrirt ehe / Das Bier aber / vnd
sonderlich das Weisse oder Weitzen Bier /
besser / Denn die jenigen / so Bier trincken /
essen wenig / das nicht geschehen würde /
wo nicht die Biere viel nutriments vnd
narung geben.

So findet man auch der grossen vnd
starcken